

1. Mizorama Local Council leh Village Council inthlanah party malin sorkarna an siam theih lohna hmun 117 a awm.
2. Chakma Autonomous District Council huamchhunga Village Council inthlan vote thlak chu thla leh March ni 12 ah neih a ni dawn.
3. Prime Minister Narendra Modia chuan firfiakte do turin India leh America-te chu nghet takin an tangdun a ti.
4. National Games vawi 38-na chu vawiin chawhnu khan ropui taka khar a ni.

<><><>

SEC REVIEW ON LC AND VC ELECTION

Mizoram State Election Commission tarlan danin Local Council leh Village Council inthlan neih zawh takah party malin sorkarna an siam theih lohna hmun 117 a awm. State Election Commission Secretary Pu K. Laldingliana sawi danin Village Council 554 leh Local Council 110-ah inthlanna hi neiha ni a, hetah hian ZPM chuan Local Council leh Village 321-ah sorkarna an siam a, MNF in 149-ah sorkarna siamin Indian National Congress chuan 57 ah an siam bawk, heng bakah hian Independent sorkar siamna hmun 9 a awm bakah BJP sorkar siamna hmun 1 a awm bawk.

<><><>

I&PR MINISTER

Information & Public Relation Minister Dr Vanlalhlana'n tunlai khawvelah awlsam taka thuthar hriat tur awm mahse thudik leh rintlak thliar thiam a pawimawh a ti.

He thu hi vawiina Indian Institute of Mass Communication, MZU Campus-ami a tlawhna ah sawiin Minister chuan tunlaiah thuthar awlsam taka hriat tur awm mahse thudik ngaihchan hmasak a pawimawh fo a ti a, thuthar thehdarh kawngah pawh journalist te chu midangte hriattur chhawp chhuah kawngah awn lam neiloa puan chhuah a pawimawh tih a sawi.

Minister chuan IIMC-a zirlaite chu Mizorama an awmchhungin a tam thei ang ber Mizo nunphung a tha lai zir tama, an zirchhuah huna an chhawr tangkai theih tur thlang thiam turin a chah a, Mizorama thuthar thehdarh dan kalhmang hriatchian tum a, midangte kawm tam turin a chah a, MZU campus-a IIMC awmna chu hmun tha tak anih thu sawiin zirlaite tan boruak tha leh thawm bengchhenglo anih bakah azirna atana an mamawh engkim awmna hmun tha tak a ni tih sawiin IIMC hmun dang nena tehkhin pawhin a chhuanawm thu a sawi bawk.

Vawiina hun hmanah hian MZU mi pawimawh hrang hrang leh Doordarshan leh AIR hotu hrang hrang an tel a, heng bakah hian IIMC zirlaite an tel bawk a ni.

<><><>

CADC VC ELECTION

Mizoram State Election Commission chuan Chakma Autonomous District Council huamchhunga Village Council inthlan chu thla leh March ni 12 anih thu a puang.

Mizoram State Election Commissioner Dr. H Lalthlangliana chuan vawiin khan a pisa-a thuthar thehdarhtute kawmin he thu hi a sawi a, inthlan puan a nih atang hian CADC huamchhungah election model code of conduct kenkawh nghal a nih thu a sawi a, State Election Commissioner chuan CADC hnuaia Village Council chhunga In 50 awm chinin VC seat thum an neih thu leh In 50 atanga 100 inkarin seat 5 an neih thute bakah In 101 atanga In 150 in seat 6 leh In 151 atanga a chunglamin seat 7 zel an neih theih thu te a sawi bawk.

Mizoram State Election Commission tarlan danin CADC huamchhunga Village Council-a ding turte hming pek luh hun hnunng ber atan tun thla February ni 19 ruat a ni a, hming pek luh te endikna hun atan February ni 21 ruat a nih bakah hming pe lut inhnuk kir duhte tan February ni 24 thleng hun pek an ni a. CADC hnuaia Village Council-a vote tla te hi vote thlak ni vekah chhiar fel a ni dawn a, vote thlak that ngai a awm a nih chuan vote thlak tuk March ni 13-ah neih that leh tura ruahman a ni a, March

ni 17 a VC tinte inpeih fel vek tura tih an nih bakah a tuk March ni18-ah VC thlan leh a kaihhnawih pawh zo fel vek tura ruahman a ni bawk.

Chakma Autonomous District Council E-Roll thar berah vote nei thei mi 37,883 an awm a, hi mipa 19,162 leh hmeichhia 18,721 an vaiin mi 37,883 an awm a, chhungkua 16,991 awm ang a chhinchhiah a ni.

CADC huamchhungah hian Village Council seat 88 a awm a, General seat 428 leh Reserved seat 88 a awm a, CADC hnuaia VC seat awm zat chu a vai a belkhawmin seat 516 a ni.

CADC huamchhunga Village Council lian ber chu Kamalanagar-I niin hetah hian voter mipa 840, hmeichhia 838, a vai a belkhawmin mi 1678 an awm a, chhungkaw 725 awm ang a chhut a ni bawk. Chakma Village Council te ber chu Gobasuri niin hetah hian chhungkaw 60 an awm a, voter mipa 58 leh hmeichhia 56 an vaiin 114 an awm a ni.

<><><>

CSAB PRESS CONF

Sorkar laipui hnuaia Central Seat Allocation Board hotute chuan Mizo thalai tam zawk India rama zirna in tha-a an luh theih nan puhi an inhuam reng thu an sawi.

He thu hi vawiina Aizawl Press Club-a thuthar thehdarh tute an kawmna-ah sawiin CSAB hotute chuan Hmar chhak zirlaite'n India rama zirna in tha National Institute of Technology hnuaia NIT+ system hnuaiah seat 2000 chuang an neih an beisei thu an sawi a, Mizo zirlai a bik takin science leh technical lama kalte chu Joint Entrance Examination (JEE) 2025 hmachhawn tur leh hemi atana an hming pe lut theuh tura an duh thu an sawi bawk.

CSAB hotute chuan Mizo zirlaite chu rampum anga chhut pawh a thiamna leh theihna nei tha tak an nih thu sawiin, tumruhna leh thawhrimna nena India ram chhung zirna in tha a lut ve ngei tura an duh thu an sawi a, hemi kawnga an inbuatsaihna ah harsatna leh hriatthiam loh an nei a nih chuan an tan an awm reng thu an sawi a, counselling pawh hmarchhak zirlaite tan an hawn thu an sawi bawk.

<><><>

V-DAY BLOOD DONATION

Association for Voluntary Blood Donation (AVBD), MSACS leh Civil Hospital Aizawl te tangho chuan vawiin khan Valentine's Day pualin damlo mamawh apiangte hman tur thisen pek runpui an buatsaih a, District hrang hrangah hriat theih chinah thisen unit 663 mitlawmngai ten a thlawnin an pe a, thisen puetute hi mipa - 442 leh hmeichhia 221 an ni.

Aizawl Dawrpui Multipurpose Halla Valentine's day blood donation camp-ah hian Civil Hospital Aizawl blood bank tan thisen unit 304 lakkhawm a ni a, thisen petu mipa 179 an ni a, hmeichhia 125 an ni ve thung a ni.

He hunah hian National Health Mission Mission Director Dr. Eric Zomawia chuan thusawiin midang hnena thisen pe thei tur chuan hrisel that a ngai a, hrisel tha tur chuan kea kal tam leh meizuk loh te a pawimawh a, hei hian tunlaia hluar tak heart attack leh stroke bakah cancer thlengin nasa takin mi a veng thei a ni a ti. Thisen pek kawngah hmarchhak state zingah Mizoram chu ti tha pawl a ni a, kum 2011 leh 2013 a MSACS-in hmarchhak state puala thisen pek chungchang zir hova intawhkhawmna an buatsaih atang khan Sikkim, Arunachal Pradesh, Meghalaya leh Nagaland te pawhin nasa takin hma an sawn ve phah ta a ni a ti bawk.

AVBD President Pu C. Lalnunnema, chuan kum 2010 atang khan February ni 14, Valentine's Day thisen pek runpui hi buatsaih tan a ni tih sawiin, kum 2010 atanga nikum thleng khan Valentines Day a thisen pek zawng zawng hi unit 10958 lai a tlin tawh thu sawiin, tunah Mizoramah blood bank 11 a awm mek a ti bawk.

AVBD Gen Secy Pu Lalrinkima chuan Kumina thupui chu 'Hmangaihna lantir la, thisen pe ang che' (Show Love, Give Blood) tih a nih thu a sawi a, Civil Hospital Aizawl bakah, ZMC&H Falkawn, Lunglei, Saiha, Champhai leh Kolasib District-ah te pawh vawiin hian thisen pek runpui hi buatsaih a ni,a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

PM MODI-US PRESIDENT

Prime Minister Narendra Modia chuan firfiakte do turin India leh America-te chu nghet takin an tangdun a ti. Nizana US President Donald Trump nen White House, Washington DC-a an inkawm zawha chanchinbumite an kawmnaah he thu hi sawiin ramri kana firfiaka chetna chu chak takin an do zel dawn a ti a. Prime Minister Modia chuan India leh US thawhdunna chuan khawvel tha zawk a siam thei tih sawiin ram pahnih ten an inlaichinna chu tihlen an rem ti a ti a. Technology hmanga thiamna leh theihna te tangkai taka hman an tum tih sawiin hemi hnuaiah hian mineral pawimawh bakah bungraw tha leh damdawi siamna lam hmanruate tam zawka inpek kual dan tur ngaihtuah a ni ang a ti a. Prime Minister Modia chuan India-in ram venhim hna a thawhna kawngah America chu a pawimawh hle a ni a ti a.

India leh US chuan kum 2030 ah chuan an insumdawntawwna chu dollar tluklehdingawn 500 chuanga tihlen an remti tih sawiin Los Angeles leh Boston-ah Indian consulate thar hawn anih tur thu a puang bawk a ni.

President Donald Trump pawhin India leh US ten thawhdunna tur pawimawh tak tak an siam thar tih sawiin US leh India inzawmna chu a danglam bik a ni a ti a. Energy lamah inremna siam niin US chu India-a oil leh natural gas thawnluttu lian ber a ni dawn a ti bawk. Khawvela sumdawwna kawng lian ber tur India-MiddleEast-Europe Economic Corridor siam turin inremna an nei a ti bawk.

Tun tum hi President Donald Trump-a lakluh anih hnuah Prime Minister Narendra Modia'n US a tlawh hmasa ber a ni.

<><><>

NATIONAL GAMES

National Games vawi 38-na chu vawiin chawhnu khan ropui taka khar a ni a. January ni 28 atangin Uttarakhand-ah National Games hi neih tan niin kharna hun hi Gaulapar International Stadium, Haldwani ah hman a ni a. He hunah hian Union Home Minister Amit Shah chu khuallian a ni a. Meghalaya Chief Minsiter Conrad Sangma, Indian Olympic Associatin President PT Usha leh mi pawimawh dang thahnem tak an tel a ni. Kumin National Games ah hian a pumpuiah Services Sports Control Board chu pakhatna niin Gold medal 68 an la a. Maharastra leh Haryana ten an dawt a. Mizoram chuan gold medal pahnih leh bronze medal pakhat lain 28 na a hauh a ni.

<><><>